

10. maj 2022

UPA 2022/70/120

Inatsisartut aalajangiiffigisassaattut siunnersuut Inatsisartunut Siulittaasoqarfik partiit tapiissutaat pillugit inatsimmi allannguutissatut siunnersuummik saqqummiussinissaat Namminersorlutik Oqartussani ukiumut sipaaruteqarnissaq aammalu partiit akunnerminni aningaasatigut naligiinngissuseq annikillisarnissaa siunertaralugu. Partiinut tapiissuteqartarnek pillugu inatsimmi allannguutissatut siunnersuuteqarnermi suliniutit uku ilaatinneqassapput: 1. Partiinut tunngaviummik tapiissutit ukiumut 1 million kr.-mut qaffanneqassasooq 2. Qaffasinnerpaafissaanut killiliussaq atuutsinneqalissaaq taamaasilluni annertunerpaamik qinigaatitanut tapiissutigineqartartoq qinikkanut arfinilinnut killiliunneqarluni. Inatsi 1. januar 2024 atuutilersinneqassaaq.

(Inatsisartunut ilaasortaq Jens-Frederik Nielsen, Demokraatit)

Inatsisartut aalajangiiffigisassaattut siunnersuut, Inatsisartut Siulittaasoqarfiat peqquneqassasooq siunnersuummik saqqummiussissasooq, Naalackersuinikkut partiit ingerlatsisut naatsorsuutaasa tamanut saqqummiunneqartarnerat pillugit Inatsisartut Inatsisaat allanngortinneqarnissaannik taamaasilluni partiimut 10.000kr. sinnerlugu aningaasaliissuteqarsimanermi partiip naatsorsuutaanni kina aningaasaliissuteqarsimanersoq taamaallaat allaqqanani, kisiannili aamma aningaasaliissutit qanoq annertutigineri aamma allaqqasalerluni. Aningaasaliissutigineqarsinnaasullu killissarititaa avaqqunneqarsinnaassanngilattaq inatsisitigut pisussaataasunit arlaliusunit avinneqarsimalluni.

(Inatsisartunut ilaasortaq Jens-Frederik Nielsen, Demokraatit)

Inatsisartunut ilaasortaq Jens-Frederik Nielsen Demokraatineersoq siullertut Siumumiit qutsavigiumavarput, partiit tapiissutaat pillugit allannguuteqartoqarnissaannik aammalu Naalackersuinikkut partiit ingerlatsisut naatsorsuutaasa tamanut saqqummiunneqartarnerat pillugit allannguuteqartoqarnissaannik siunnersuutaanut.

Kingullermik Naalackersuinikkut aningaasatigut tapiissutit 2017-imi Inatsisartuni suliarineqarput, taamanikkut tapiissutaasartut ukiorpaalunni iluarsiiiffigineqarsimannginnerat aammalu akinut naleqqussaaffigineqarsimannginnerat patsisaalluni.

Siunnersuuteqartup isumaa malillugu nunatta karsianut sipaaruteqarnissaq aammalu partiit akunnerminni aningaasatigut naligiinngissutsip annikillisinnissaa anguniarlugu siunnersuut manna qaqilerneqarpoq, tamannalu sumut sammiveqarluni isiginnittaaseqarnermik toqqammaveqarluni oqariartornermiittutut Siumumi isumaqarfigaarput.



Siumup tunngaviusumik isumaa naapertorlugu, maannamut partiimut tunngaviusumik tapeqartitsineq kiisalu partiip qinigaatitaasa qanoq amerlatiginerannik toqqammaveqarluni tapeqartitsineq pitsaasutut isumaqarfigaarput, tassuunakkummi partiit qinersisoqarnermikkut qanorluunnit inissisimagaluarpata tapiissutinik "naammaginartunik" qulakkeerinnissinnaanerat tunngavilerneqarsimasutut isumaqarfigigatsigu.

Siumumit pingaaruteqarluinnartutut isumaqarfigaarput, tamat oqartussaaqataanerat inuiaqatigiittut tamatta illersussagipput. Tamanna akeqarpoq, aamma soorlu naalackersuinikkut ingerlatsiffippassuit aningaasat ikigisassaangitsut atorlugit inuiaqatigiittut aningaasalersorivut. Una pineqartoq allaanerunngilaq, demokratiimilu pinngitsoorneqarsinnaannani. Siumut isumaqarpoq, uagut qinikkatut toqqaannaq sullinneqarnerput apeqqusersorniarneqarsinnaanngitsoq, aamma uagut qinikkatut sulinerput inissisimanerpullu nalikinnerulersinniarneqassanngitsoq.

--

Siunnersuuteqartup siunnersuutigaattaaq naalackersuinikkut partiit ingerlatsisut naatsorsuutaasa tamanut saqqummiunneqartarnerannut atatillugu kina aningaasaliissuteqarsimanersoq kisiat allaqqanani, aamma aningaasaliissutit qanoq annertutigineri allaqqasalissasut. Tamanna Siumumit pitsaasutut isumaqarfigaarput taperserusullutigulu.

Sumiluunniimmi pisortat ingerlatsinerat eqqartorneqartillugu Siumumiit ammanerusumik ingerlatsinissamik anguniagaqarneq tapersersugaraarput, taamaammallu siunnersuut manna tassungarpiaq sammiveqarmat isorisassaqaratalu tapersiissuteqaannarsinnaavugut.

Taamatut oqaaseqarluta siunnersuutit ataatsimiititaliamut susassaqartumut suliarineqartussanngorlugit ingerlateqqinneqassasut innersuuppagut.

Anders Olsen, Siumut